

## ■ TRIBUNA POLITICA

# Metter refurma da la gulivaziun da finanzas en la dretga glisch

DA BARBARA JANOM STEINER,  
CUSSEGLIERA GUVERNATIVA

In comité cun represchentanants che derivan oravant tut da las vischnancas las pli ritgas da l'Engiadin'Ota e d'in pèr vischnancas cun tschains d'aua ha lantschà in referendum cunter la refurma da la gulivaziun da finanzas. Quai è lur bun dretg. Uschia vegn il project suttamess ad ina votaziun dal pievel.

Is adversaris crititgeschan però las consequenzas da la refurma cun pretensiuns ch'èn cumprovadamain simplamain faussas. Da cumenzar en questa moda e maniera ina campagna da votaziun na demussa ni correctadad ni onestadad. L'interess general na stat qua evidentamain betg en il center. Perquai ston vegnir scleridas tschertas chaussas.

Il comité sa preschenta sut il slogan «Refurma da la GF – betg uschia!» Cun lur critica terreschan els tut la nova gulivaziun da finanzas, perquai ch'ella cuntrafetschia a l'idea grischuna da solidaritad ed engrondeschia la differenza tranter las vischnancas mo anc pli fitg. La mesadad da las vischnancas grischunas perdia tras la refurma e surtut las vischnancas finanzialmain deblas da la periferia vegnian indeblidas.

Quai na constat betg. Precis il cuntrari è il cas. La refurma da la GF rinforza la gulivaziun da finanzas duravlamain per ch'il foss tranter las vischnancas povras e las



vischnancas ritgas na daventia betg pli grond en il futur, mabain pli pitschen. Uschia profitan las vischnancas finanzialmain deblas cun bleras fracziuns ed abitadis sparpagliads cleramain il pli fitg da la refurma. Questas vischnancas sa chattan per gronda part en la periferia ed han per regla ils pes da taglia ils pli auts. Ellas vegnan sustegnidas cleramain pli fitg che ussa tras ina gulivaziun da las resursas e da las grevezzas.

Il chantun impunda var 122 milliuns francs dapli per onn per rinforzar las vischnancas. Ultra da quai vegnan las vischnancas finanzialmain fermas obligadas d'esser in zic pli solidaras. Lur contribuziun a la gulivaziun da finanzas è fitg moderada e duai ultra da quai vegnir limitada fermamain en la nova lescha davart la gulivaziun da finanzas.

En la regiun da la Survelva per exempel survegnan dus terzs da las vischnancas cleramain dapli meds finansials tras la refurma da la GF. Tut en tut vegnan a cular passa dus milliuns francs dapli per onn en questa re-

giun. Pervia da la midada da sistem perdan però las trais vischnancas finanzialmain deblas da Mundaun, Sagogn e Trun privilegis existents e vegnan sustegnidas uschia in zic main. Ma ellas survegnan vinavant contribuziuns fitg grondas e vegnan ultra da quai a profitar in tschert temp d'ina cassa da cumpensaziun.

Nus mussain las consequenzas da la refurma en moda fitg transparenta. Sche Vus vulais savair dapli da quest tema bittai in'egliada sin il dossier «Gulivaziun da finanzas» sin la pagina d'internet dal chantun ([www.gr.ch](http://www.gr.ch)).

Facit: Far in referendum è in dretg legitim. Betg legitim n'è per cunter la derasaziun publica da pretensiuns che cuntradin cleramain als fatgs. Qua poss jau mo dir: «Comité da referendum – betg uschia!» La refurma da la gulivaziun da finanzas rinforza oravant tut las vischnancas finanzialmain deblas che han grondas grevezzas geografic-topograficas e che sa chattan en las regiuns perifericas. Ella reducescha las differenzas tranter las vischnancas povras e las vischnancas ritgas ed ha consequentamain en egl'interess general.

Jau sun persvadida che la via tschernida da nov per in project che tegna quint dals interess d'ina maioritad è buna. Per dumagnar bain las sfidas futuras duvrain nus ina gulivaziun da finanzas gista ed efficazia.